

靈  
芬  
館  
詩  
話

靈芬館詩話續卷四

吳江 邵慶 祥伯

亡友陳晴巖太史傳經媚學取友平生如玉冷泉澗松高鶴  
閑迺甫入詞館卽赴玉樓所遺止一弱女生前詩文莫有能  
收拾者良足慨息曼生僅得其歲莫懷人詩四十一首爲刻  
之於木其自序云燕臺霜瓦吳客雪衣孤檠善愁獨酌多暇  
忍枯條之吟葉驚臘鼓之打春方慙恩於親故復紆軫於歡  
讌然皆擅名江鄉振采海內鸞伏鵠隱之秀冰懷月抱之奇  
不第經神味腴詩仙嗜癖也四十一人大半皆余所相知者  
其中亦多有物故讀之淒然江聽香云鍾王畜靈氣千載入  
君手愛好少存詩救貧多賴友薄游計屢左多病有衰叟蔣  
蔣邨云談論迂且拙強半費人解苦吟聳雙肩脫橐囊盡賦

僧房老寓公風月幾錢買陳曼生云綽有名士風一笑擅三  
絕篆刻世共尊山農轉嫌拙榆館夢春游嶺南花似雪見懷  
云奇哉白眉生狂態轉秀嫵縱譚花欲開擲筆天可補碧淨  
鶴湖樓抱琴向誰撫頗能妙于形容

海寧許蔚堂孝廉鍊曼生舅氏也抗心希古不爲時風世氣  
所移沒後曼生爲梓其恭止居遺詩二卷七言好爲長吉義  
山之體選詞鍛句時苦僻澁五言力追韓孟其高處幾於入  
室秋懷十四首最爲古峭今錄其四男兒志四方遠遊良所  
慕自顧無寸長惘惘將何遇先友晨星稀何人爲我故十年  
春夢中不識滄江路空堂誰與語獨遊何所遇悠悠我心憂  
周皇足驚怖天宇非荊榛拙者窘其步春山有故人落花桃  
源路朝爲山中人暮爲泉下土去來相因依一暝成萬古將

求一日閒皓首飽茶苦將爲千載憂壯齒登鬼簿石燕不知  
風海燕不知雨君平邈千秋三兆空醜縷日夕天氣涼獨與  
短檠對奔濤撼地來盪若秋城碎所履或非土無乃長鯨背  
啟戶驚出視庭檻宛然在殘月却當花小犬花陰吠童子爲  
余言今夜星移再律句如雨餘人獨立路轉見雙扉河梁遊  
子淚官柳故人情鐙火揚州前度夢鶯花寒食再來緣蕭疏  
節裏偏宜雨疏密籬邊若有人

詠菊

皆自然雅調集唐五律

至九十二首如忽見寒梅樹復聞啼鳥聲白髮催年老青雲  
羨鳥飛古路無行客空山正落花不愁明月盡轉覺故人稀  
一葉初飛樹千聲各爲秋野路正風雪人生足別離山中無  
歷日身外卽浮雲誰知新歲酒還是異鄉愁客路青山外餘  
生白首歸久病先知雨經忙始愛閑卑枝低結子老樹飽經

霜皆天然渾成可以遠追介甫近接竹垞

恭止令嗣名寶沅字筱軒早年天闊未見其止有釣雪山人  
詩存一冊其佳句有野望云燕識山家屋人敲竹裏扉秋日  
云古渡見衰柳前邨歸暮禽哭姊云年遠回思前事少路遙  
欲見病容難

前樊補之以馮補亭詩數首見示已摘入第十卷中矣頃從  
曼生所又得見其手彙一帙前有吳兔牀先生題字云補亭  
遭惡疾目雙瞽沈頓六七寒暑備歷諸苦垂危又當酷暑幾  
不能斂手足形天之報施於若人何不幸至於此也姑畱斯  
編以俟後人未審有能爲之表章者否余未識補亭而其友  
如曼生梅史南廬裕園諸君皆余石交也雖不足以傳其人  
得不爲之動心乎今就帙中再摘錄數首於此以慰詩魂及

兔翁惓惓之心於泉下汶陽途中云重嵐頻出入遙見汶陽  
田馬立山頭店人喧渡口船清霜剛十月旅鬢感經年贏得  
齊州勝煙霞寫蜀牋晚泊蘭溪云漲水欲崩堤波痕盪不齊  
回橈入浦激近水有招提晚翠圍舡住嘔禽隔竹啼不知鐙  
火盛祇在郭門西枕上口占云萬壑千岩裏征鴻借一枝竹  
牀回夢後饑鼠瞰鐙時夜靜寒尤峭山深月尚遲照人孤宿  
處欹枕動相思春日卽事云陌上愔愔少鈿車薄寒料峭殢  
春華瓊牋賸取銀豪判催放西山萬樹花豆蔻梢頭芳訊遲  
東風吹綠已差差似聞一夜廉纖雨抽得堦前鴨腳葵章江  
竹枝詞云盈盈蕩漿水雲中鴉鬢橫飛撲面風浦口行人齊  
目斷玉簫吹出滿江紅戲水鴛鴦近畫橈雙飛雙宿自朝朝  
儂家生小江邊住不願牽絲到莫徭官窰新樣五文章雲物

空嶽載滿航最恨年年江上水送人夫壻上浮梁補亭於此  
道甚深五七古亦沈著矯健惟音調頗有不諧且亦未免貪  
多之病佳處固不可磨滅也

李白樓方湛爲朱青湖先生高足同岑集所刻僅十之一二  
沒後見其手藁十二卷於曼生所曼生屬爲定其可存者將  
爲彙行因勘錄一過而撮取數章如聞鮑家詩唱也睡燕云  
懶向閒堦覓落紅任他門外過東風魂安香壘初成後春老  
珠簾不卷中小苑日斜天似水高樓人去草連空迷離未醒  
三眠柳料得心情與爾同曉過臨平云侵曉臨平道推篷雨  
乍晴客身先鳥起山影逆舡行路轉雙橋合煙收一鏡明到  
家知不遠猶自數歸程積雨用竹垞韻云去年臘雪不釀寒  
老蛟飲泣陂塘乾今年水族大自在對對鯉魚游上灘鳧鳧

茶煙不出扉調朱自畫野薔薇無聊權當春光看夢向枝頭  
作蜨飛金子家住金陀坊季占譚詩門酒誇身強三日不見  
心作惡着屐張蓋來何妨風前櫛髮散千莖靜坐心如止水  
平門外已知行不得未須重聽鷓鴣聲虹橋春游有贈云華  
年錦瑟恨如何每向尊前懊惱歌手撚碧桃花自看憐他春  
事已無多卜夜頻將後約堅酒闌何事便迴船怪他無賴揚  
州月隔着春城照獨眠白樓以早梅天台石梁詩得名七言  
歌行豪宕可喜而於收尾處非漫則弱倘亦其精神不足起  
其文爲不能永年之徵耶

白樓集中有和鵲紅女子題壁詩附其原作并序云妾生自  
劍嶺遠別衣江鋒鏑之餘全家失所慈親信杳夫壻音訛命  
如之何心滋戚矣得姻親以依傍同躑躅於道途攜至蘇州



遂偕南下妄意少遲玉碎猶冀珠還期秋扇之重圓願春暉  
之永駐流離數月甫達此閒嗟乎陌頭楊柳總是離愁門外  
枇杷都非鄉景望齊門而泣下思蜀道而魂歸阿鵲阿鵲生  
何如死扶病夜起勉書數絕郵程信宿便入江南當是薄命  
人斷送處也時嘉慶六年正月十九日蜀中女史鵲紅題於  
河間道中詩云萬里漂零百劫哀青衣江上別家來朝雲暮  
雨翻翻看一路山眉埽不開深閨小命弱如絲金鼓聲中怯  
幾時回首嫖姚軍裏望分明馬上盡男兒阿母音書隔故關  
兒身除有夢飛還年年手濯江邊錦不穀人間拭淚斑藁砧  
望斷路盈盈敲罷金釵憶定情妾自馬嵬坡下住此生只合  
卜他生小婢嬌癡代理粧窮途怕檢女兒箱兒時愛譜江南  
好未到江南已斷腸霧鬢風鬟一段魂啼絲扶住幾黃昏殘

膏背寫傷心句界亂啼痕與粉痕此詩不知白樓何從得之  
豈好事者託爲此哀怨之章以眩惑行客抑真有薄命紅顏  
馬上來耶然其詩筆皆工不妨過而存之以爲傷心嘉話

己山詩筆甚美雖入之未深清詞麗句往往而有同人欲徵  
其所作輒秘不肯出今以余所同作時錄出及所記憶者爲  
錄於上銷寒第七集詠春泥云沙痕無處尋鴻爪陌上時還  
沒馬蹄春冰云荒汀淺水遲遊櫂曲澗迴流觸釣罾和頻伽  
憶故園梅花云遠岸微波初解凍隔江新柳漸成絲見秋山  
閣坐月云流雲近月明於水遠樹籠煙濃似山題余神廬圖  
冊子詩云小水勢回環隔溪如古渡何必扁舟杭別有煙霞  
趣月明人語喧一雙鶴飛去

影鶴

小小屋三間盈盈水一曲

淡淡夕陽斜隱隱浮嵐綠牆陰一角缺尚須添種竹

三分水閣松

風吹滿衣松花落滿地老此支離翁相賞有真意譜入瑤琴

絲泠泠太古思

松

不能高插天毋寧小如拳蒼然一夔足所

貴其天全有時山雨來亦復生微煙

山一朶

一帶蘊籬圍數間

茅屋敞瀟瀟風雨來坐聽四壁響不知前溪流昨夜幾尺長

賞雨

不論醉與醒隨意唱且和有不速客來排闥卽入座把

盃問主人已入醉鄉臥

酒人所避

尚有歲暮樂府及臘八粥諸作

皆工

東臺袁嘯竹承福余與相識於邗上時方合四方之士大會

虹橋置酒紫筠精舍衫痕釵影至今猶在夢魂中也近晤老

薑知嘯竹已赴蓉城之召恨當時同作之詩未及鈔錄惟記

其落葉一聯云斜飛笠上疑疏雨乾走堦前識久晴

李瘦仙天徵有小秦淮竹枝云入門未見春多少先見堦前

姊妹花又芳草碧如桃葉渡祇無一角紫金山眼前語甚工  
老薑爲余誦之

有以水南先生畫求售者己山重價得之皴法絕似王叔明  
其蒼秀之色溢於紙墨銘心絕品也其畫乃寄方南堂者自  
題二絕云石梁霞起夕陽時二十年來繫夢思邨口白雲邨  
外瀑終當此處結茅茨少小相期事耦畊勝遊那不共君行  
好將雙屐多添蠟趁未衰殘向赤城後跋云辛酉春日偶欲  
爲天台之遊因作小幅寄我南堂先生知必鼓棹南來也此  
詩集中不載故錄之想見兩先生雲霞之交如此

蔣君芝軒與余定交於己山觀復齋知其爲廉吏子也因請  
觀其先德香涇先生遺詩芝軒云先人所著有西爽橫經舟  
車金臺寰州白華諸集身後多所散佚間爲人持去今鈔錄

所存僅千餘首名尚友堂遺詩鈔分爲四卷出以見示五古  
樸茂真淳直吐所欲言入都錄別諸作性真孤露得少陵之  
神七古開闔變化不主故常而於矩矱無倆豪髮其他近體  
間或出入宋賢要能自樹風骨而音雅節和無踴躍凌暴之  
習雨中登金山云渡江一十九兩度到金山足已輸人健神  
應笑我頑雲霄開佛界風雨暗鄉關如聽塔鈴語何時此客  
閒蹋閣疑乘躋江天一覽收煙中迷建業樹杪辨揚州縹緲  
人行畫蒼茫景變秋禪牀如可坐玉帶也應畱平魯元夕云  
城頭睥睨影參差近郭人家閉戶遲天外雲山螭螭塞月中  
鐙火好妨洞市門土銼沾桑落小婦琵琶唱竹枝衰病合招  
僮僕怪駝裘擁臥負芳茲次兒南歸云到家頭角儼成人門  
戶蕭條釜積塵他日汝爲廉吏後半生我是苦吟身由來只

達多知命豈有男兒肯諱貧勤讀詩書敦孝弟窮冬歷盡也  
逢春偶成云秋水三篙細漿划銀塘一帶柳毵毵夢中好景  
須臾失獨對空庭洗手花和內子病中云淋浪半月響檐端  
桃李遲開怕晚寒料得放晴剛病起春光還汝十分看題春  
江花月圖云一簇濃花夾去津有人樓上惜芳春崔郎枉着  
銷魂句未必桃花得似人雨中渡王家營云渡口人家掩竹  
關桃花新漲上沙灣米顛圖畫分明見只少濃皺數疊山臺  
庄題壁云縹緲涼天一雁橫蠟花頻翦句初成太行秋色兼  
天遠卻指并州是去程他佳句如宿威遠城云月高烏繞樹  
風定虎窺門雨泊錫山驛云寒暄畧識天公意去住都關骨  
肉情清明日梁溪舟中云綠酒暫謀今日醉青山已作異鄉  
看送人云別後故人期白首秋來歸夢滿青山聽雨軒小集

云酒逢佳日何辭醉春在閒門不待尋和吳蠡濤舍人云入  
世未深思閉戶出山纔卜計歸田偶成云新患頭風思讀檄  
久嬰肺病愛蒸梨藥方日久妻能檢詩草春來手自刪自知  
到處隨窮鬼人說前生是謫仙送族孫入都云多病辭官非  
勇退異鄉疏族亦關情先生恬淡無宦情成進士後需次一  
官又在崎嶇絕塞間罷官後襤被蕭然故書數篋而已錢辛  
楣學士序其詩云唐詩人之達者元微之宰相也高達夫薛  
能方鎮也白樂天尚書也吳子華韓致光內相也而楊盈川  
姚武功以縣令簿抗衡其間後人尚論其品聲價未嘗少貶  
焉豈非以文章千古事深造自得卓然成家者僕指可數初  
不以班資之崇卑爲優劣乎可謂知言矣先生名麟書字震  
遠芝軒名均蘇州元和人

汪侍御梅鼎余未識其人往往見其爲人作畫畫必有詩皆  
翛然絕去筆墨畦逕可稱兩絕頃從己山處得見澣雲詩鈔  
佳處正不止一遭也獅林晤黃小迂云雲林縈舊夢倦眼喜  
重醒藤瑣松身白雲穿石骨青樓臺君抱月驛路我披星一  
席東華話今宵剪燭聽舟至篁墩云滌器湔裙話水涯兩般  
梳髻看堆鴉離愁此際全拋去聽着鄉音就到家雪歸吟云  
靈犀通處夢皆真梅竹難邀夢裏身翻恐夢魂來覓我亂山  
殘雪不逢人卽目云漠漠春陰小院東海紅花已褪殘紅紙  
鴛鴦斷無人管絆向低檐自趁風皆詩中有畫者也題畫詩  
最多最工爲金古槎題云拋去胭脂不畫花滿池水墨盪清  
華青山一桁濃於黛寫出江南客憶家題家竹坪畫云嶺上  
青雲疊疊封占春花已十分濃綠華昨夜瑤池晏醉倒流霞



一萬鍾蕙孃才調古今誇勅掌娜嬛護絳紗祇道仙家清徹  
骨那知顏色勝桃花題畫扇贈史望之云湖天沈霽晚霞多  
幾處樓臺傍古柯君欲通詞向誰氏小紅闌外有微波題畫  
贈左仲甫云白浪掀天擁巨鯨鴻毛一沓萬船行小洲不聽  
風濤響只有人家笑語聲題自畫云興到狂呼灑墨頻拈來  
洞壑見天真水流花放杳然處如此空山尚有人佳句如贈  
黃素峯云靜極冥搜客經年喜結鄰若非鐙有影祇道室無  
人愍忠寺云花如將去客佛笑再來人枯井云波瀾非本性  
灌溉負初心敗壘云四郊傾舊址萬骨釀春泥春草云青過  
荒塞斷紅葬落花深卽事云霜風塵馬力霧氣裏河聲過臨  
城驛憶亡友云字蝕斷垣悲舊雨日蒸殘雪化春煙舟中感  
懷云遠港碧隨孤棹轉夕陽紅壓萬鴉沈出都別友云三年

先我貧爲客雙眼看人早到家

松江俞春浦琵琶爲今時第一向遊上海爲李寧圃先生所  
賞同人贈詩成軸前年已山邀至袁江句畱旬日苦思其家  
恩恩告別而去嘗乞余作詩未有以應也澣雲集中有聽俞  
春浦琵琶一詩甚工今錄以補余之缺可以傳其人矣老魚  
瘦蛟嘯亂流鳴鸞囀鳳深巖幽弓刀陣馬沙場秋雨帷風箔  
兒女愁推手卻手誰善撈春浦絕伎今無儔吟猱撥刺輪袞  
優此妙原是琴中搜人言碎響不可收恒河沙數君能籌人  
言脆滑宜清謳詭怪變幻無此喉忽寫興亡增百憂兩漢六  
朝弔山邱忽寫頭陀苦行修千聲萬聲佛號稠座中啼笑語  
唧啾莫將今古窮雕鏤請停鐵撥浮金甌窗外鬼瞰風颼颼  
哭蘭雪蒿梁二十年前舊友也然未覩其全橐近見其廬山

紀遊詩較前作更多進步五古超然自得七古頓挫瀏灠如  
我爲看山來山下雲又生詩亦如白雲隨意爲縱橫又亮彼  
虎谿笑應無峴山悲真實得上諦焉用浮名爲又廬山無主  
峯峯峯自雄長五老分獨尊橫絕衆峯上一峯一老人萬古  
入俯仰等句皆卓然可傳其李太白讀書臺一詩尤工匡山  
讀書處頭白不歸來金匱石室惟荒臺我疑太白非仙才神  
仙御風行暫居亦蓬萊俯視九州若藩溷出泥入雲何爲哉  
君本長庚星入海偶遊戲朝下蛾眉山暮踟長安市宮嬪如  
花奉覲來沈香亭侍君王醉了我事者郭汾陽識吾心者賀  
知章將軍脫鞵頗吾辱要挽銀沙濯雙足一朝謫滿辭王公  
依然手把金芙蓉十洲三島未免太卑濕洞天卽在五老之  
中峯奈何不肯自設晦一生徑坐詩篇窮高歌半夜鬼神泣

搖筆萬里雲煙空天之所秘不可洩奪以奇句天無功上帝  
聞之怒其頑罰令不得歸仙山烽煙躑躅行路難豈容高臥  
雲松閒我疑太白非仙才乃以才累殊可哀嫻嫻一閑不復  
開洞口日日惟風雷請君投此夢花五色之神筆埋以陰壑  
萬古之蒼苔人間俯仰甘塵埃悔過或望天心回踐汝丹厓  
翠壁舊盟誓毋令山魃木客相嫌猜我才非仙亦非鬼折除  
清福今餘幾昨夜見君弄明月身跨鯨魚瀑雲裏詩雖苦吟  
才不高天應薄罰寬吾曹讀書願借青蓮谷不乞先生宮錦  
袍蘭雪風流跌宕自願甚高詩亦時無與儷者往年相遇武  
林有詩贈之云應俗文章游子淚及時蝦菜異鄉春蘭雪讀  
之惘然欲和而未就風塵淪落爲之棄歛

溟漚集張子貞與其友三人合刻所作詩也其中江素山詡

與余舊相識汪玉屏坤則前歲寒食泛舟紅橋子貞介而相  
見者後玉屏又復遠遊遂不獲合并其詩五古澹蕩七古縱  
橫時有近太白處小秦淮春曉曲最佳漏聲竭鼓聲歇比戶  
巢鴛鴦沿花宿胡蝶珠網微微織曙光還疑半斂花窗月流  
蘇帳壓春愁重未醒吳儂蜀山夢忽地流鶯喚曉粧門前已  
纔芙蓉幾箇人強起青蛾斂尚怪春宵不肯長打漿復打漿  
郎今欲何往露草綴新啼煙絲媚餘想勸郎莫向西家住西  
家樓高天易曙五律渡花江云百折羊腸險梯空一縷微江  
聲疑到海雲氣忽生衣我儼從天降波猶作雨飛可憐瘴鄉  
路日日履危機七律除夜同子貞過玉照軒索飲云正好屠  
蘇對客傾草堂鐙火勸開罍人逢此夜閒難得酒向吾曹出  
有名屈指又看增一歲常時何飲不三更松枝翠活紅鑪暖

共守春風坐到明七絕江上望九華云宵深筆研慣安排睡  
起銅陵曙色開忽見篷窗峯影落九華山特送詩來雲中仿  
彿露煙鬟離合神光隱見閒十五年來容不改美人可得似  
名山玉屏拓筆依人多行役山水之詩過大橋河入陡觜云  
橋剛隨地盡人欲上天行遊寶蓮寺云石林秋迸筍竹鳴午  
啼雞飛雲岩云萬古崖陰埋日脚幾重巖隙架松根皆能寫  
目前之景於豪端

素山詩如司馬倦遊王粲憂生顚顚婉篤彌能動人春日雜  
興云春社尋常有壺觴日與俱藏闔占小集摘句作新圖莚  
菜鱸同鮓櫻桃筍一廚所遊皆汗漫未受俗情拘大化理難  
齊浮生意欲迷茵因松作本萍以水爲泥至樂尋莊惠幽憂  
笑阮嵇祇憎深樹裏杜宇盡情啼雨後庭中秋花云於此見

生意庭花綴雨痕漂零秋士淚黯澹夕陽魂粉蝶不時下幽  
禽如有言稍看新月意疏影滿前軒紅橋會飲有感云一棹  
恩恩腹痛回當年花下幾傳杯其人已化酒星去此地誰歌  
薤露來明月在天如在水西風飛雨亦飛灰可堪韓孟聯吟  
日偏向黃墟問舊醅悼儲玉琴豎善田上人云虎谿客散草  
芊芊誰召巫陽問此緣李白欲畱無昨日謝安難寫是中年  
酒傾北海樽仍在路轉西州馬不前漫與文人參慧業生天  
成佛總茫然送小石上人之豫章云暇日談經坐佛幢無端  
別夢繞吳艤揚州不合高僧住手折梅花獨渡江東林西去  
接西林杳杳鐘聲遞遠岑倘倚孤筇重回首江南江北正春  
陰芍藥云提壺聲裏玉人簫客不魂銷酒不消生恐將離心  
太苦楊花遮斷夕陽橋眞如洗馬言愁黯然欲涕素山貧就

鹽筴之官富商大賈去之惟恐不速日與布袍韋帶之士行吟躑躅於冷煙寒水閒詩則工矣窮又安所避耶

淩芝泉霄少喜任俠有好事之目嘗偕方子雲來西湖因得識之時家已日落而豪宕自喜如故也有詩云一斗男兒淚千金國士恩重過大梁道不見信陵門古木饑烏集歧塗落照昏昏茫茫塵海外誰識舊王孫七律多佳句但微落纖巧舟中夜雨云亂山回首夢無數寒雨到船鐘幾聲美人鐙云芳年月姊剛三五仙籍夫人本上元病起云新病起人如鶴瘦舊遊過地有花紅送春云紫陌曾聞來有腳青年最苦別無家奢念妄思三月閨癡情空替百花愁

宜芳女士許善仙曼生子婦小曼之配也幼隨宦四川歸里後追思昔游作輕舟出峽圖自題詩并序云丁卯之春侍母



赴蜀時余年甫十三閉置篷窗不知眺覽洎隨任奉節官舍  
踞山麓近永安宮故址巫峽在其南白帝城在其西瞿塘灩  
澦在白帝城下春水旣生江流浩浩有一日千里之勢庚午  
春嚴君奉諱回里道經魚復浦躋香山神女峯明妃里工部  
草堂萊公故井以及黑石黃牛之險青竿白象之奇輒爲一  
一指示覺山重水複窈窕幽邃眞神仙之窟宅也生小閨中  
得與壯遊而同懷五人翬翬愉愉尤平生不可多得之樂今  
兩大人重赴巴蜀吾姊偕壻畱都下緬想昔遊感慨係之爰  
作圖以志并紀以詩巫山高矗白雲邊灩澦瞿唐水拍天萬  
里川原入圖畫一家骨肉聚樓船不知蜀道難如此但覺滄  
洲坐渺然歷歷舊游渾似夢回頭令我倍纏綿

宜芳嘗題余靈芬館第六圖云疏疏竹石自清閒水翦吳淞

碧一灣庾信有園容小隱莫教詞賦動江關秋色分明紅蓼  
洲不妨岸上屋如舟縱饒湖海豪猶昔合向雲溪號醉侯詞  
意俱工圖爲錢七叔美所作髣髴待詔叔美題云畫爾幽居  
小邨舍桑疏竹密槿籬斜田鳩作陣晴呼雨松火穿簾午焙  
茶長日著書攜弱弟閒齋說餅試藤花夢尋煙雨樓頭路便  
趁溪風上釣槎朱理堂云鶴湖一水接鱸鄉中有盧鴻舊草  
堂人以閒情比鷗鷺天生此老爲文章閉關添闢栽花地隔  
宿先謀飼鶴糧指點畫圖曾到處翦淞閭外幾垂楊琴鳴云  
眼中彈指見華嚴麟閣騷壇未可兼仰屋著書君自得應官  
聽鼓我終嫌不除仲蔚門前草早下君平肆裏簾好及春光  
賦歸去玉梅花發待巡檐顧竺生改名昀云聞說移家好分  
湖卅里通魏唐我未到應與水邨同絕勝船牽岸仍憐腳轉

蓬蕭蕭數椽屋閒殺畫圖中伯生云置身絕頂極峻嶒百尺樓高此一登我是華陽舊賓客可容輕到第三層萬廉山承紀云籍甚聲華歎賣文淮陰市上屢逢君狂吟久作詩壇主痛飲時張酒國軍五畝規園酬願早萬間闕厦復誰聞卜鄭己負青芝約怕寫吳江舊水雲樊補之云題詩讀畫莫蹉跎又認先生安樂窩長日筱廊調白鶴晚風水閣看新荷圖中景出塵標格誰能竝傳世文章自不磨我似羊求來往熟扁舟載酒便相過小曼四首之二云故山成久別小築此幽棲田舍老奇士鶯花續舊題但教書滿屋不惜醉如泥早識杜陵叟草堂似讓西江左尊壇坵才高自不羣閒身五湖長豔體六朝文孤抱朗如月閒情澹似雲佳占詹尹卜時爲禱靈芬雲璈題輕舟出峽圖詩甚工亂山如畫繞荆門霧鬢雲鬟依

約存不是巫山經十二畫來誰似此眉痕陳琳才調最風華  
況復園中有大家自笑才如船上水不能浣出錦江花又題  
蔣芝生賣畫買山圖云閩海歸來兩鬢絲解衣想見虎頭癡  
千岩萬壑圖應遍結箇草堂定幾時相宅頻年當意難不如  
仍向畫中看天然位置君休忘萬頃西湖一釣竿句如大風  
過分湖云打窗紛細沫迴掉擁盤渦風吹寒水立雲挾布帆  
飛魏塘夜歸云天因釀雪連雲凍船爲宵征帶夢搖秋聲云  
敗壁孤鐙蛩亂語滿山寒葉雨爭飛寄人云詩如酒味醇方  
好交似梅花疏更佳皆妙

奇節異烈較尋常貞孝之詩易於著筆然必詞足以達使躍  
然見於紙上乃可傳之有詠山陽李烈女者云婦鮑氏許字  
李恪恪死女矢以守父母不順爲別字他姓女婉告父母須

一祭李墓乃嫁父母聽之女密置硝磺於衣絮中偕幼弟至墓祭畢焚紙錢以身近之頃刻盡熱欲救不得也其烈偉矣而詩不稱余屬張君老薑重作一首詩云太山不可移海水不可竭爺孃休逼迫女兒志已決鴛鴦豈重匹鴟鳥休爲媒媒人堂上坐鬼伯門前來女兒適新人當辭故夫墓再拜耶孃前含悲口難訴出門不再回近墓不願生故夫九泉下含笑當來迎拜墓化紙錢引火焚衣裳旁人救不得著體皆硫黃硫黃旣得火一發無斯須神焦鬼亦爛況此血肉軀悲風卷地來白日慘煙霧形隨餘燼消魂逐故夫去生旣結同心死當同此穴婢合在九泉耶孃逼不得難移是太山難竭是滄海請看烈女心至死何曾改又有以詹烈婦事索詩者其族孫爲作行狀甚詳余詩云絕粒一句死何烈女中乃有詩

文節後夫一年待子生子天卽時死已決叩首兄公立夫後  
手製縣衾奉阿母自闔雙扉斷勺飲母來女來哭穿牖戚卹  
歎息鄰里哀共亮此志終難回請登家祠設生祭士女淚盡  
千瓊瑰先時祠中夜有光族人聚議爲何祥豈知正氣通冥  
漠婺星作作生寒芒富家女兒飽稻粱冥冥墮行如蟲蝗烈  
婦一死若蟬蛻呼吸沆瀣驟鸞皇婦程夫詹增鏞名婺源東  
鄉居遠城單門有此益可敬乾坤質之金石銘二詩頗謂能  
達

靈芬館詩話續卷五

吳江 郭馨 祥伯

方南堂先生貞觀爲桐城詩人眉目惜未得其全集有人以  
手抄見示者僅數十首又皆近體然已足見一斑矣京師秋  
懷云慈仁坊左鐵門前落拓王城漫五年歸計直如圖作佛  
曠懷那復夢游仙頻煩故老爭分俸慙媿須眉坐受憐積習  
不隨憂患盡破窗猶設舊青氊 詔還故里紀恩云綱開一  
面感重華聖澤湧流詎有涯直似秋霖還土偶豈同黨錮怨  
匏瓜由來造命憑君相不料餘年有室家得遂首邱何以報  
惟應努力事桑麻南堂以株連隸旗籍久而放還其詩幽怨  
之旨仍得和平忠厚之意所以佳也他如老樹云春深微有  
葉僧老昔看花趙姑祠云獨鳥遠飛芳草外孤花剛謝夕陽

時答馬相如云自入秋來常中酒一從君去斷吟詩辭鴻辭  
之徵云天下鄒枚原不少山中猿鶴可全空鳶肩縱與諸賢  
竝馬齒先悲去日長送人入都云暮齒自嫌傷感易少年常  
看別離輕皆工

程在山鍾偕其夫人顧生香隱居西磧山中以詩酒自娛世  
有梁孟陶翟之目其詩皆有刊本余未得寓目今於鐵門吉  
光片羽集中讀之爲撮一二在山初入山示內三首尤古澹  
可味山澤性所好餓驅味行藏負戴入荆扉春陽動林光惠  
風從東來飄飄吹羅裳亦有忘憂物興至輒命觴飛鴻何冥  
冥浮雲何洋洋相與憑運化江湖永相忘日出衆鳥鳴庭樹  
含新翠南窗一迴眺湖波渺天際境曠迹獨幽性達理同契  
何必霸陵山索居甘遜世琴書物外緣桑竹閒中味非隱亦



非樵斯焉可位置何以數晨夕筆硯共箕帚何以解饑飭秋  
菰及春韭山川本性靈閨門卽賓友知足乃不辱觀空自離  
有彈指去來今誰言身世久我倡君爲和新月照窗牖在山  
所居名逸園有清暉閣九峯草廬魚船上諸勝而騰嘯臺  
尤爲勝絕全湖在目湖中諸山出沒隱見若青螺之在銀盤  
背枕西磧如倚千仞翠屏天風高寒幾忘人世余採梅鄧尉  
曾造其上臺基猶存無片瓦尺木矣

生香夫人名信芳 顧太史秉直女鐵門以爲詩筆清老過  
於在山其雪窗對梅酌酒壽外云去冬日暖無寒威冷豔不  
待春風吹虬枝鐵幹競先發綈衣綽約傾城姿美人娟娟倚  
明月月色如霜花似雪花前對月夜不眠月影花光兩清絕  
入春三日凍雲連雪花飄盪春風顛高下千山失樵逕迷離

四野鋪瓊田梅花綴雪更明靚瘦骨凌寒氣逾勁獨立空山  
壓眾芳紛紛桃李誰能並君今五十耽林泉掉頭不肯入市  
廛小閭草元忘歲月逸品與花伯仲閒余亦年來謝脂粉寒  
井轆轤牽素綆擁絮敢誇孺仲妻巢居且伴孤山隱短歌歌  
成雪正狂銀瓶煮酒添霞觴酒酣祝君壽而康歲歲花開樂  
未央讀其詩知山水協趣真神仙中人矣

鐵門又錄金陵閨秀王德卿貞儀詩數首云得之逆旅主人  
其詩蕉萃婉約廣陵寒食云寒食揚州路春風吹柳花可憐  
芳草色青徧玉鈎斜荆棘中見梅花一枝云惜爾生非地蕭  
疏欲斷魂寒煙空綠萼瘦影自黃昏欲折愁傷手將移怨託  
根臨風一悵悵顚顚與誰論

吳江周慎字誠哉工制義門下士頗有掇科名者周獨終老

諸生枕上一律云秋老蟲聲壯夜涼花氣浮催詩疏雨過照  
夢一鐙畱辛苦人間世逍遙物外遊窮年高枕臥無酒亦忘  
憂周詩非專門而風格頗高

余向疑杜詩陶侃胡奴句之斷非用侃子之名妄意或用陶  
峴奴事已筆之前卷中頃閱四庫全書總目於劉敬叔異苑  
下按語云杜甫詩中陶侃胡奴事據世說新語但知爲侃子  
小名勸驗是書乃知別有一事甫之援引爲精切云云乃自  
笑不學妄論之失惜未見此書後當補入以證之

嘉慶癸酉張君敬軒約同人放櫂天香庵探梅因共作詩而  
南廬查世官爲首倡敬軒錄爲一冊出以見示其中佳句如  
珠一一南廬云老幹百年思舊澤空山一士享高名馬小眉  
云老幹槎枒思舊侶橫枝冷澹占新晴夏亞生云橫枝如壓

一墻雪高會先期十日晴周梅坪云好詩合倩花爲骨真賞  
何煩酒藉名徐壽魚云來攜雙屐凍苔滑到值四山春雪晴  
李引樹云徑仄不曾緣客埽春寒特爲看花晴李今嬾云地  
近荒邨畱老樹天因佳客放新晴吳榕園云天作寒暄詩有  
料人非離合酒無名查春園云果嗣唐音多妙句如披晉帖  
快時晴爭摹宋代一梅古誰繼詩人三李名敬軒云對酒讀  
詩兼讀畫看花宜雪復宜晴用韻送南廬云畫許古香雙管  
下簾添今雨幾人召金春玉應琅然可聽也天香庵後改爲  
李徵君秋錦昇第之祠故二李之詩云然前歲余曾偕今嬾  
雲伯同過其地老幹寄崑崙花厯落正如楊補之畫格傳是  
宋時物也

松江姚春木

椿

天下士也年未四十卽棄去舉業斂門埽軌

以著述爲事余與相識二十年中間間不相聞己卯春春  
木來吳門下榻于古雲百一山房時甘亭亦在焉古雲以書  
見招亟往就之執手道舊各爲憮然余方欲刻雜著續編俾  
之攻摘瑕疵春木亦以三年中詩見示因得讀一過五古自  
選體以及宋賢靡不淋漓而自樹風骨七古出入李杜韓蘇  
之間較昔時所見不啻逕庭其中如大龍湫靈巖送毛生甫  
赴閩劉松年十八學士圖望黃山諸峯詩頓挫瀏漓直入唐  
賢之室矣篇長不能備錄有題船山遺稿次見贈韻四首序  
云船山詩藁多散佚庚申在都下有詩四首書扇見貽頃偶  
檢得之而集中失載因次原韻錄存以志故人之感詩云浮  
生原偶寄噩夢忽驚回飲斷人間酒收還地下才何心官職  
競多事佛仙來怕聽蕭蕭竹空餘叔夜杯作意都成巧無心

偶出奇龍涎天上試鶴背夜深騎冷月神猶妬癡雲夢亦疑  
倉庚能療疾休問入宮醫成都春萬里撩亂浣花牋多難干  
戈久還家道路偏夜愁孤燭語秋夢一琴傳我亦題橋客拋  
書更自憐諭俗詞原淺憐才意自眞浮名千古事俊語六朝  
人長揖揮卿相新聲泣鬼神空山餘澹薄寶氣獨終淪今亦  
錄船山原作於此云摩空聲不定一字幾徘徊藻翰皆生氣  
東南此異才論嚴詩筆正心動化工來難後豪情減因君又  
舉杯小扇臨風贈長歌忽振奇美人春不妬天馬怒難騎僊  
籍誰眞注名場我漸疑麗工森可怕詩病莫輕醫相逢皆少  
壯餘力且題箋風格中年定時名衆口偏開懷原偶託揮手  
任無傳繚繞神仙字蟬魚太可憐妄語疲酬贈狂言爲汝眞  
交才謀一面氣已辟干人文古曾非貌詩飛或有神科名身

外事此筆豈沈淪

春木七律沈著高華各有其勝江心寺云詩人著屐登臨去  
丞相提戈慟哭來東坡生日云二賦流傳風月笛三星顯頓  
斗牛箕哀汪選樓云相如橐草無封禪劉蛻文編待勒銘聞  
蓉裳將卜葬云詩冷吳江萬楓葉魂歸蜀道一鵲唳和人云  
巴水有情無那雨蜀天如夢不宜秋用魯直借書韻云提壺  
笑客不解事螢火照人還讀書春木少爲萬里之遊邇年又  
探台宕黃山九華之勝蓋真得江山之助者也

吳門何錦字豈匏詩工五律一體深得四靈風格甘亭言其  
生平最得意之作嘗爲誦之云寂寂歲將晚西風吹滿郊間  
招逢霽赴亂夢過春拋緘茗不成餉借書仍廢鈔城西光福  
路幽處可誅茆又嘗自云得一句古屋上鐙早未有對遲一

年病中忽得下句乃續成之云臞身易葛遲始知兩句三年  
得一吟雙淚流古既有之今亦宜然也

春木別後見寄一律云郭生落落異人羣天馬行空脫繼紛  
責我一言真至當期君千載有斯文嗽心未敢欺他日索解  
終須待子雲同是醉翁門下士相逢餘礎惜斜矐春木亦姬  
傳先生弟子故落句云爾深媿老而慵情不克副其所期也  
嘉興李旦華字憲吉秋錦徵士之元孫也夙成好學經史靡  
不淹貫有十六國世系表後唐書各若干卷尤邃於易有周  
易象義未成力辨先天及河圖之非其舅氏楊謙爲作行畧  
以爲稍假以年當爲鄭漁仲馬貴與一流惜未三十而沒兩  
應 召試皆在乙等以優貢入成均試不得志鬱鬱終其令  
嗣遇孫出其書蓮館詩見示登臨懷古諸作最工鄴下懷古



云曹公橫槊解吟詩古直蒼涼絕代奇烈士暮年多慷慨西  
陵今日尚然疑雲寒臺殿松杉杳秋老關河鼓角悲此夜月  
華涼似水棲烏猶遶兩三枝幡影居然選佛場鐘魚猶自頌  
高王銀瓶斷絕哀湍瀉白塔峻嶒落照涼下秣秋原迷碌碌  
叢祠古瓦認香姜銅駝荆棘緣何事遺恨周師入晉陽河朔  
陰森莽陣雲唐餘戰鬥正紛紛六州强大盤根久兩姓興亡  
移足分鐵錯鑄成真失計銀槍募得號能軍遙瞻亞子登壇  
地不見靈旗繞紫氛餘如滹池河云渡口風煙高邑暮關門  
山色太行秋邯鄲云大漠風高飛隼急平原日落晚鴻哀寄  
朱南池云鄉國夢遙烹黍約塞垣耳習捲蘆聲河陽驛渡河  
云天低白草迷津口風卷黃雲入浪花其自傷淪落亦時見  
於其間董東亭夜話云黃香邨有無雙譽溫嶠甘居第二流

詠古云不愧中朝第一人廣平抱負迴離塵誰知文戰低眉  
日且與梅花爲寫真鏤月裁雲穆羽和詩人清怨玉溪多不  
須惆悵通仙籍閭闔門高可奈何讀者可以悲其意矣

李金瀾遇孫與余相識於梅里馬君家嘗爲題其先徵君灌  
園圖近見其消寒雜詠諸作雅音惜惜不媿門風園鑑云霎  
時回暖氣努力學冬烘探梅云得信才今日相思已隔年懷  
張雲巢云張星光照東西瀾白傅才超中晚唐落落未曾謀  
一面遙遙相與證千秋金瀾甥應天垣亦能詩有舟行云斜  
射日光孤塔白倒垂山影一江青

桐鄉夏叟維善字兩邨晚景落魄喪其婦及女侍因感異夢  
遂自號夢禪然胸懷曠達時放扁舟往來石門鴛湖諸故人  
家酒場歌地跌宕不減少年余與相識於吳門後又同集梅

里叟有詩錄別云崇山曲水徧尋詩問爾家園住幾時嫋嫋  
東風楊柳綠屋邊閒殺十三枝今歲偕小脂諸君見過又有  
詩云老境偏愁話別離將離先要問歸期魏唐冷浸三更月  
正是思君返棹時時余又將束裝也

梧門先生法式善風流宏獎一時有龍門之目己卯歲余應  
京兆試先生爲大司成未試前余避嫌未及晉謁先生已知  
其姓名監中試畢呼騶訪余於金司寇邸第所以勸勵期待  
之者甚厚下第出都猶拳拳執手望其再謁省門書聯見送  
云一輩登科慙李卻半年太學去何蕃然卒之皓首無成以  
不舞之鶴爲羊公累吁足悲矣先生嘗有詩見贈近料理故  
篋重一繙閱不禁涕之霑膺錄此以志感媿君從山中來蹋  
此槐花影埽榻城西徧蕭然塵事屏思君不得見使我心耿

耿青衫逐時髦漂泊劇浮梗兩戰皆拔幟驥足始小騁知人  
古所難致此吾其幸願君長閉關無事廣造請眠早食宜加  
讀書隨意領清齋坐月明北地防秋冷先生詩集聞已付梓  
窮居遼隔亦未得見有詩話十餘冊交屠太史琴鳴爲之校  
栞亦未果終當與琴鳴共成此事庶報知己於萬一耳

近兒輩於故書攤上買得詞彙一冊自署風谿邵豐城前有  
王鐵甫題字其中交遊惟許澹人張遠春爲余所知詞筆雖  
未能清靈婉約然著題處頗有用意蓋學辛劉而未成者爲  
登二首庶免名字翳如之歎清平樂渡柳云潮平風靜水色  
明於鏡縹緲波心浮塔影更著遙山相映呼舟逕渡蒼茫艣  
枝劃碎秋光浦口日斜漁散白鷗飛近船牕臺城路秋草云  
芳痕怨入東風裏曾經喚愁多少綠尚含滋青將變色次第

商飈吹到池塘夢杳奈吟斷春情頓孤懷抱落日閒門伴他  
疏柳影低照黃雲橫亘萬里想霜飛遠塞沙冷先槁雨洗涼  
螢煙迷瘦蝶更有幽蛩相弔征袍漸老悵遊子天涯故園荒  
了記否羣腰一條斜更好

閨秀舒妣字嗣音余友薛可庵之室也可庵嘗以其綺雲樓  
稿見示久不記憶鐵門曾錄數首皆清麗可喜除夕云聽徧  
街頭爆竹聲春回小院夜三更也知歲盡無堪守爲等梅花  
坐到明池蓮云半畝荷池白石塘亭亭才見試新粧晚涼知  
有微風至先卷珠簾待送香其姑名靜娟詩有附見集中者  
送春云寂寂空庭步綠苔送春欲賦更徘徊落花忍與詩人  
別飛過銀牆不轉來

余好輯錄近人詩之無某本者單辭隻句每易堙沈也與余

同志者鐵門有吉光片羽集伯生有秋唱集思欲彙爲一編  
迄未能成伯生秋唱集聞以轉徙失之惟鐵門所鈔無恙然  
寥寥篇帙不克單行今爲錄數章於此其已入銷夏錄者不  
再列戴延年號葑坪長洲諸生徙居吳江東門外任城阻雨  
云濁醪成獨酌不寐自閒吟細雨鳴秋驛疎鐘見客心泥塗  
憐瘦馬遙夜感羈禽明發西風裏愁聞落葉音班馬嶺云絕  
磴捫蘿上危厓一綫通路懸飛鳥外泉響亂雲中苦竹連邨  
暝蠻花帶日烘茅蓬堪小憩魯酒借顏紅古寺云夕陽迷紫  
翠半嶺叩松關僧眼碧於鷺鐘聲寒過山泉香流法乳竹密  
擁煙鬟最愛閒雲影孤飛鶴共還春盡云春盡山居倍覺長  
竹窗棐几靜焚香蹋枝幽鳥忽飛去殘雨梢頭搖夕陽廷標  
字半邨不知何姓鐵門于杭州骨董攤上買得舊扇有詩數

首白云錄舊作因鈔存之中有答玉几生詩當是雍乾間人  
潼關云極目孤城落照閒一鞭秋色度秦關哀笳戍鼓不知  
處隱隱黃河繞亂山別友云柳絲榆筴亂隨流交割餘春上  
客舟春色贈君愁贈我小紅樓畔莫回頭又三釋子詩云得  
之故書中不知何時人也一宗衍題扁舟醉眠圖云江水蕭  
蕭江岸風泊舟不歸何處翁龜鼉出沒浪如此爾尚醉遊春  
夢中空山雲深白日靜松聲如濤屋如艇歸來歸來無久畱  
不歸恐爾且覆舟其一蒼雪送朗癭入匡山云獨向匡廬住  
禪關第幾重九江黃葉寺五老白雲峯落日眠蒼兕飛泉下  
玉龍到時應爲我問訊虎溪松其一通潤將歸鐵山畱別三  
如學公云曉起春寒甚思君巖上廬當門雪幾許倚杖興何  
如不日理歸棹無人傳別書臨行恐草草先此託江魚種松

老人云飯後罷鉏春寒山信短筇偶隨孤犢去適與老人逢  
見面不知姓自言能種松橫岡千萬樹大半已成龍其所鈔  
閨秀詩尤工黃裳吳郡人未嫁卒病劇口占云病骨支離氣  
似絲熏籠強倚暮寒時霜豪與我行相別再四拈來未有詩  
繆孟翹字樊君未婚矢志不貳自號冬青子有恤緯吟寒夜  
云寒生刀尺懶縫裳烏鵲驚飛夜有霜金鴨香銷人寂寂起  
看殘月度空廊詠菊云月中疏影幾枝斜三經荒涼處士家  
冷豔幽香誰得並倚闌人更澹於花嚴蕊珠字綠華吳江人  
夙慧好學年二十而卒滄浪亭云瀟灑前賢地閒循曲逕行  
野花自開落山鳥忽飛鳴風月容長嘯漁樵問舊盟濯纓人  
不見孤影鑒澄清題畫絕句云墟里散炊煙蒼蒼徧林樾樵  
歸華子岡犬吠柴門月落葉濕還飛昨夜邨中雨樹影隔寒



江煙外聞柔艣沈采字虹屏平湖陸梅谷姬人杪春云拂罷  
春山理鬢絲茶煙裊裊坐來遲杏花開後江南雨正是紅蠶  
上簇時又一絕云束綾斜裏月初收纓絡玲瓏舞未休一樣  
金蓮生足下觀音自在窈孃愁袁蘭貞字湘佩吾友湘湄族  
姑歸陳芝房進士和龐蕙纓香奩瑣事詩云梧竹蕭疏覆屋  
低空梁燕壘落香泥兒家不作遼西夢一任黃鸝自在啼冷  
風疏雨釀春寒種種名花保護難今日圍屏添一架夜來新  
到建州蘭又於龐鶴霄詩中得其表妹王素芬夢蘭宮詞十  
首今錄其六云雲鬢花容總是空從來薄命爲顏紅蛾眉自  
分同春老那得金錢與畫工寂莫空庭鎖綠苔長門何日爲  
君開淚珠滴地成鹽汁底事羊車引不來脆管清笙只自娛  
沈沈玉漏滴銅壺六宮岑寂無人問夜半傳呼覓念奴月送

清輝風送涼半簾花影上銀牀身輕卻羨雕梁燕銜得宮花  
出上陽澹煙籠樹雨初晴徙倚空牀夢不成香冷鐙殘金殿  
悄阿誰微度玉簫聲顏羞脂粉黛羞螺幾度妝成喚奈何三  
十六宮閒似水昭陽殿裏奏新歌

蘆墟陳夢琴希恕余中表叔行也以感異夢遂以爲號有夢  
琴圖余曾爲題詞其上夢琴家僅中貲而收書厚價賦稟孱  
弱而於學溺苦余每過舊居相見輒以其詩見質嚴事若弟  
子之於先生余媿不敢當也詩詞皆出自機杼意主新雋雖  
仲官體弱而固非肥皮厚肉所可同語病起過兩行齋與袁  
雪圃話舊云一笑園林破鶴眠今番重結再生緣竹扶石丈  
久疎面梅傍牆匡已及肩家有叢書供我讀門餘祖德藉君  
傳文窗不覺清譚久日午花陰過八軋種菊云忒覺蕭疏牆

半凹鉏泥自補菊新苗年來病骨嬾於鶴不爲秋花不折腰  
庭前桐樹云先人手植記曾知廿載光陰去若斯相對不禁  
慚老大是他見我作兒時小園竹云斷卻人蹤一逕苔讀書  
窗外綠成堆豈知有个幽尋客愛向竹深深處來句如名畫  
不教寒具污古琴要作水聲聽客如楓意新添醉詩帶秋聲  
畧近商琴能倚醉且支枕石可畱題不用牋皆宋人佳調詞  
亦多俊語花朝雲璈見招令姬人出拜云想與花朝花樣似  
漸漸漸濃芳訊題怡綠齋倡酬卷云惜惜一曲闌干靜更羅  
裏娉婷如玉只那時減字偷聲早被翠禽聽熟夢琴年未三  
十又不涉外事書牀鏡檻茗椀爐熏不惟享讀書之福抑亦  
卻病之方也

夢琴又介其友柳湄生樹芳朱藹亭瑞增兩君之詩因雲璈

以見晤兩君所居皆去蘆墟不十里扁舟載書時相過從結  
文字之飲和皮陸之什故其格調亦皆相近涓生好爲深湛  
力矯浮靡五言古詩如閒居讀史八首與春日雜興諸作皆  
有欲闢古人門庭之意如靈氣鍾於一得天每獨厚散之千  
萬人醜薄如魯酒霜雪勞人骨執綺佚人情因苦得甘節懷  
安實取名古來有志士溫飽性所輕入秋令人醒入春令人  
倦和風日吹噓筋骨少鍛鍊疏慵性易成晏逸情所戀萬事  
一因循流光去如箭等語具見自立不同流俗少年膏粱子  
弟皆可書一通銘座右也七律亦婉約有致新漲云雉尾青  
開連夜雨鴨頭綠上五湖煙新煙云斜陽屋角炊何晚曉日  
樓臺畫未成檢閱寄林遺詩云曲有誤時方待顧花當刪處  
不求多積陰云湖光積水全生白雲氣埋山不放青又有勝

溪竹枝詞如干首網羅舊聞遺事頗爲詳核余嘗謂分湖之名見于吳越春秋其來最古元明諸勝流如楊廉夫陸友仁輩皆修文譙于此其題詠散見著錄而近時流風迢然深可慨息振起風雅不能不厚望於後來之秀也

藹亭與余家有戚誼自余移居後久不相聞今得其一冊恍如聞足音而跼然也其和靈芬館寒宵四詠鐙影云無寐一宵永幢幢爾許深一花含暮意半釵有冬心是處息羣動何人正苦吟照來離夢遠晚晚更難任雞聲云膈膊何爲者邨深聽轉遙霜天人乍醒茆店月無憀易喚離鄉感偏驚少睡宵東方未明候客路又迢迢霜華云霜色逼江關蕭蕭木葉殷斜飛一片影吹落萬重山月冷噉猿起風高斷角還棲棲遠行客歲晏動離顏鑪火云閣小重簾護霏微氣暗催幾星

留火活一夜逗春來坐暖時呼酒譚深欲陷灰經旬門不出  
忘了雪成堆聞天寥上人逝云凶問傳來或恐訛把君詩卷

重脚踟多生慧業三生債海上空龕住得無鶴湖小住記前

蹤

天寥先時嘗  
主于靈芬館

晚愛譚禪詩更工立石題名他日事封書誰

報郭林宗謁亭與天寥未及相識而相感如此知風雅中自  
有真性情也其夫人徐嫻若名應娛虹亭先生四世女孫亦  
工詩詞有月當樓倡和之作華朝云瑤天圓住一窩雲錦幃  
吹香不耐熏廿四番風春九十兩邊花事正平分題陳秋史  
亭角尋詩圖云淺着林花紅一隈孤亭斜照數峯開有人詩  
境先探得繡屐一雙點綠苔自注謂麗卿夫人麗卿湘湄徵  
君之妹亦能詩謁若月當樓納涼聯句末云題就新詩嫌未  
穩先教念與素娥聽雅韻可想

錢唐施石樵紹武生平孤峭自喜與陳秋堂蔣蔣邨諸君莫  
逆學詩於朱青湖曾刻入同岑集中舉孝廉以母老不應春  
闈食貧厲志屢空泊如前年以瘵疾沒矣蔣邨爲刻其靈石  
山房彙三卷五七古皆蒼勁可觀微嫌才力薄耳近體工穩  
時得佳趣晚至會僊橋看梅云空山春意早幽步晚來偏嵐  
氣欲成雨梅花都似煙過橋人小立落日鳥初還尚憶西谿  
曲寒香拂釣船練川棹歌云寒機軋軋夜偏賒織得棊花勝  
紫花郎到安亭須記取板橋西去是兒家黃白涇西繫釣舟  
傳來枯骨認潛虬黃塵碧海千年事見說麻姑也白頭疎枝  
低亞綺窗前小閣香浮愛小眠閩海迢迢歸路遠無人知是  
荔枝仙自注香浮閣宋北玉所居荔枝仙宋自號也屋後垂楊鎖綠煙邨前新水  
響平田隔溪月出牽漁網繞郭春深種木絲寄懷劉芙初云

一第艱難才子命百年珍重草堂詩倪米樓云才多自悔飄零早身賤翻憐去就輕皆工

犀泉以其大父願圃先生小稱意齋詩藁見示和雅之音恬澹之抱真有德者之言也先生以中書分守太平旋請急里居功名晚達而仕路又蹭蹬不進故其酬友人韻云侵尋不覺鬢毛斑作手何緣得遂攀每訝新聲如異俗老耽故紙是家山十年悔失窮經業早歲虛隨珥筆班坐遣韶光殊可惜賴君提倡及餘閒卽事云每飯不忍飽翳桑近在門俸錢當日媿蔬食暮年尊筋力誠無補詩書尚可敦眠食空送老祇覺負晨昏他如江行偶成云一般船竟前頭去到處帆多對面來效放翁云鏐鑿恐盡宜先睡米甕將空莫預聞其託意可想也家故有浮香樓爲西谿勝處查浦曾有卜鄰之約先



生有追和查浦韻二首云容易招攜其一卹獨畱佳句到衡  
門只今樹影常年繞可憶書聲入夜喧看奕有人傳橘叟牽  
蘿無力愧桐孫浮香樓畔當時事魂魄因依好細論上策唯  
應早掉頭底須白髮入扁舟菟裘老去仍謠詠華表歸來孰  
倡酬長占清風詩數卷重憐落日路周流自注先生游跡最  
遠暮年復被謫邊  
地相看窮達都何益此後真能百不憂集中有與陽湖汪芑  
湄孝廉倡和之作汪不知其人而附句極工今並錄之如夢  
中得路仍爲客病裏看人總是仙開齊楊葉煙逾碧落過桃  
花雨不紅先生名瀛洲

廉山言任邛道上有一伎題壁詩云悔隨浪跡住蝦蟆一入  
風塵事事差未必有情都眷屬可憐逝水似年華鐸鈴苦憶  
檐前馬沙磧橫吹鬢上鴉鬢髮如雲渾不埽自包羅帕上蓬

車後署云某月日送不識字兒郎過此不知真有此伎抑輕薄者作此狡獪也

唐陶山觀察仲冕向宰吾邑治聲藹然亡友袁湘湄其所舉士也以國士待之時有恃與援請託者公不爲奪余亦繆以文字獲知乃以久客遠外不相見者十餘年今歲公以攝篆河庫道因得造謁尊酒論文出未刻詩藁見示猥蒙虛懷下詢屬爲去取快讀一過觀察有已刻詩詞集若干卷亦今始得見大約槩落枝葉獨表真實似近作尤爲老境其中古體爲多亦高於近體五古尤爲獨擅勝場請假雜詩十一首旅病雜感六首題鄧湘臯詩卷一首皆清氣滔滔風行海運而沈深渾厚蘊蓄醇醲不獨作者爲難恐知者亦未易也近體亦皆無無爲而作者五律有立秋日勘海門合龍五港云四

海爲家廣重門擊柝嚴如何橫一櫂便欲廢三監舟負難藏  
壑九封豈塞函莫言溪澗小萬斛駕長帆繡錯分州壤川流  
共此津鄰封寧是壑水監不如民開堰西門豹循阡名信臣  
被符當盡力攜襍趁涼晨陶山展墓云少植數行栢今栽一  
兩圍思親如此樹投老幾時歸人與石同瘦草無霜自肥何  
須買山隱是處足忘機淮陰舟中云買棹長淮路淮流喜未  
冰雁繩銜落日漁舍點寒鐙下水船宜艣中宵被有稜舟人  
覺來往笑問客何能七律戊寅元旦云公庭退食拜家昆願  
進屠酥酒一尊同是得年無老少幾時歸里共朝昏新炊藏  
甕冬春米細嚼堆盤生菜根如此粃盆真暖熱底須列炬戟  
爲門海上云海濱八月天氣涼濕雲一夜飛冰霜小亭搖風  
鶴鶴叫平洲滴露蒹葭蒼塵顏奔走近鮫室隴首區分窮鱉

莊萬里黃河有歸宿百年皓髮何蒼茫似此數詩不獨氣格之高風骨之重而民隱宦情孝子悌弟之思志士勞臣之感自然流露于行墨之間嘗鼎一臠足以知味矣

上元車君秋船

持謙

以所刻紅蠶閣遺橐燕歸來軒詩見脉

紅蠶閣者其前夫人方蓮漪

驪

之詩燕歸來軒則今配袁夫

人黛華

青

所作也方有伺蠶詩云晨昏調伺事初諳忙過春

風三月三吐盡情絲仍化蝶他生儂願作紅蠶故以之命名又春晚云春風渺渺又天涯小立閒庭感歲華飛入湘簾雙燕子一銜柳絮一銜花秋船爲作玉臺春影圖以寄其傷逝之思他佳句如落花驚蝶夢疏雨澹人心夢回聞落葉秋老見明河菱花鏡影無員缺柳葉眉痕有澹濃風定蛩聲清似水月涼人影澹於花袁爲吾友蘭邨之猶女與蘭邨女壽字

瑤華妯字小芬及真來二女柔吉仙筠相倡和楊蓉裳農部  
爲作袁氏聯珠集序其題關山春望圖云渺渺山程尚薄寒  
春光不信又將殘家鄉楊柳他鄉絮都要征人駐馬看小倉  
山紅葉云照眼誰誇錦樹鮮又傳霜訊早秋天美人幾箇如  
君好畱得紅顏在晚年莫愁湖次韻云煙波不藉管絃新可  
惜遲來已過春聽喚盧嫿名字好茫茫相對又愁人婉約多  
風隨園家法也黛華之姒曰王潤如瑾嫁甫年餘卽歌寡鵠  
有味蘼居近橐淒苦之音不堪卒讀其哭外云萬個琅玕晝  
色昏便無風雨亦銷魂生成竹是淒涼命只替人間染淚痕

靈芬館詩話續卷六

吳江 鄧慶 祥伯

杭州單斗南先生紹以古文擅長始慕道家言晚乃歸心禪  
悅詩不多作以格律爲主與施柳南爲方外友朱青湖爲文  
字交沒後無子聞其遺藁多在蔣蔣村所近張鐵甫以手鈔  
華藏詩一冊見示五律一體爲多皆唐賢風格也金家堰農  
家云我觀茆屋外茲亦好邛園溪草白成路梅花香一村依  
依風雪意欸欸桑麻言更健游黃鶴春帆遙入軒梁溪夜泊  
云歸途錫山下向晚柁初停溪水澄沙白竈煙借樹青徼徼  
聞戍鼓旅宿傍回汀天漢高無極今宵見客星紫陽山晚眺  
云望望富春渚孤光白鳥間潮迴海門樹天盡越州山仙洞  
尋遺蛻寒花笑旅顏茅君壇址在步履未須還他如遊雲居

寺云清懽投老得秋氣入林知早梅云谿橋殘雪裏驛路曉  
寒時七言如一病秋來眠客邸三更花上見明河浮萍身世  
雞鳴後落木關山雁影中又有詠物詩數篇皆含風刺蚊云  
性命博膏血人間爾最愚紙鳶云投閒餘老輩荒學悞兒曹  
諸城劉文清公立朝正色風稜言言然喜作小詩往往風神  
縣遠正彌覺魏公娥媚也曼生嘗鈔錄其題董香光臨宋四  
家書冊後詩云雪後溪山照眼明出門一笑大江橫龍疲虎  
困三分地留與先生曳杖行倒連滄海注銀潢幾許瓶罍可  
得藏長日閉門無一事只應清夢到羲皇何妨館閣且從容  
徐樂嚴安事不同漫向江船問消息果然東下太恩恩浪跡  
江湖不記年黃庭千字晚爭妍不知有益蒼生否卻問君王  
索俸錢君謨兩字出深宮中使開函絳蠟融取次煙雲成暮

雨遲回軒檻又東風眉宇清揚照座寒  
竭來風雪滿長安梅  
花何與臨池事欲索解人殊大難又嘗見其批答侍姬書小  
字蠶眠細意熨貼因知此公風趣不乏

理堂踏蹬名場少所遇合昨歲以病歸里今來訪余于袁浦  
出近詩見示多牢落抑塞之語雨齋題壁云舊遊已滅投人  
刺新著兼刪罵鬼文安園云花香著地秋無跡樹影搖窗月  
有聲寄曼生云廣廈置身呼負負名山退步悔遲遲旅人羈  
客讀之淒然

張仲雅明府雲璈聞其詩名久矣向於華秋榭廡齋見其所  
作數章皆清新雅麗近始得其簡松堂集二十卷五古淳質  
七古跌宕皆於矩度中見其變化近體七言詠古尤工始皇  
云韓臣早奪沙中魄徐市能成海上家漢武云方士屢傳刀



下死歲星誰識戟邊來南朝云一井燕脂天子辱滿臺花雨  
法王愁宋玉云長開一世微詞口難解三年好色心自以屢  
困春闈不得與曲江之晏時時以此寄意和落花云東西溝  
水無知已上下簾櫳已各天杏花云三月着花嫌太晚一生  
於我似無情客懷雜詠云好夢迷離卻易闌衍波牋紙未曾  
看無端賺得蕭郎至不許宮中賦曉寒蓋時以有所避不得  
與試也

王仲瞿孝廉本名曇後改名良士恃才放縱議論倣詭有達  
官以譏言上聞者遂挫頓不振然其奇氣逸材自是桑悅徐  
渭一流人水心論陳同甫曰若同甫終身不偶則爲狠疾人  
矣傷哉言乎仲瞿卒以是不第後又瞿其佳耦奔走就食於  
東諸侯間佗僚以沒可哀也其予人樹小名善才幼極穎秀

恒隨父東西不克盡心于學爲詩時有佳語嘗見其一冊過  
潯池河云黃昏飽麥飯趁曉到潯沱月落人歸市天寒鳥渡  
河風霜殘歲裏奔走少年過却是酬恩處搖鞭起壯歌揚州  
云萬里旌旗渡遼海一家花月住迷樓舟夜云春帆千里夢  
黑月五更寒樓坐云春與愁人同老去山如好女上樓來皆  
清雋不俗充以學力未見其止耳

嚴小農觀察延鐵門課其二子長曰達字子通次曰适字子  
容二子頗敏慧好學而各有所嗜子通讀唐詩得劉長卿集  
大喜刻意學之子容好爲詞取竹垞所選詞綜朝夕披尋時  
亦儼作子通落葉詩云幾日蕭條節序更無端瘦出遠山晴  
趁墟人遠孤村見乞食僧歸一逕平小院深深延月色西風  
莽莽送商聲最憐古木昏雅外一段荒寒畫不成秦郵道中

云細雨蓬窗催旅夢荒雞燈火認前途秋夜述懷云此時萬  
戶應同夢是處疏花只獨看子容浣溪沙云不飲分明有醉  
容個人生小性嬌慵無聊睡起鬢雲鬆鎮日無人庭院靜綠  
陰如水瀉簾櫳落花別是一般紅高陽臺秋柳落句云西湖  
曾記長堤外繫斜陽畫艇初橫勸離尊老了蛾眉瘦了腰身  
二子年才弱冠筆意皆清麗可喜如此昔元遺山少從郝天  
挺遊郝教以作詩與之訓和人或謂郝令子方學科舉詩非  
所急郝曰我正欲此子不爲科舉耳自今人觀之鮮不以爲  
可笑者使小農不過欲二子爲科舉之學亦何取於鐵門爲  
之師哉

海昌沈玉遮惟樹居邑之硤石鎮收藏圖籍書畫皆精品喜  
吟詠出筆輒自不俗吾友梅史每亟稱之其題畫數十首極

爲清雋方蘭坻陟壑密林云破筆亂作披麻皴突兀一燈秋  
山明松風吹松落松子泠泠響雜沙泉聲林巒幽絕不能買  
對此摩挲意猶在何當喚起太癡哥補我數間茅屋矮古樵  
紅梅贈行云孫郎短視氣偏彊標格直壓古梅枝昨朝忽憶  
空山侶淺暈疏香慰所思雪花襍從酒瓢瘦歸帆已有春風  
影不須齒冷石家詩一例人看小桃杏律句如撫琴云不知  
月已松梢挂或有人從戶外停疊石云空空便爲留雲地落  
落應無入世心觀棋云聊復支頤消永晝翻教袖手憶長安  
淪茗云泉脈遠從松頂落煙痕怕上鬢絲來品香云數卷殘  
書原耐久平生一瓣本無多皆能于體物中有遠致

春木嘗爲言毛君生甫之才而未得見已卯冬生甫自吳中  
來訪予袁浦留數日逆旅中不克究觀所著惟搜得詩數十

首皆在閩中時所作其紀行諸詩近仿少陵遠睎謝客亦出入昌黎之間憂憂獨造務爲不經人道語而力足以達之洵異才也近體亦清微峻潔無一字入俗五古峽口云電明島際雲日耀波中山羊牯嶺云徑古闕崖光林疎立岡影不知叢谷中何時具廬井漁梁嶺云殘靄竹梢明涼風葛衣灑杳杳白猿嘯臨流悵難舍七律白雁云絕塞秋心臨水遠中原霜信入關知冰雪不甘非烈士塵沙難沒是清才郊外云嶺外春寒人病酒江南歸雁客思家生甫爲海客先生文孫幼孤力學他如經術考據及歷算之學皆能通之年未三十日進不已學人才人皆未可量乃上有重幃田無一馬葛衣風雪棲棲道途爲負米之計豈將以困厄之境玉成其人歟  
吾友汪已山尊甫葛村先生名凱工舉業以早主家政不復

應試嘗以事居吳中數年暇日輒有吟詠手錄僅數十首已  
山出以見示五律爲多意主唐賢不爲剽刻而自然兩雅憶  
昔云他鄉逢令節而我倍淒其撫物陳遺杖當筵捧舊卮童  
牛歸阜疾乳燕掠波遲陟屺瞻雲杳惟憑入夢時野步云得  
趣世情淺探幽逸與偏鐘聲傳寺古石髮助春妍風埽林間  
葉溪添雨後泉行將謀野醉莫惜杖頭錢他句如風斂林初  
靜雲濃天欲低樹深微透日斜古不聞鐘深山見古木暗月  
起微煙雲輕方吐月浪緊忽移舟皆唐音也又有天晴帆影  
重一語尤工

嘗聞梧門先生搜輯同時先後詩人之作名及見集卷帙甚  
富然未之見也今年霽青以之廣信太守任道出袁浦劉芙  
初太史以札見寄云梧門沒後此書在某處凡十六帙其中

選輯尚有未盡善者屬霽青交付爲之釐訂以俟刊行云云  
時霽青行賒未解約至家見付并自任剗廁之事爲之躍然  
以喜不特吾師閭幽發微之心得以少慰于九京而稿項黃  
馘苦吟顛顛之士有僻遠沈冥不獲傳於世者藉以單詞隻  
句託之不腐豈非盛事耶芙初書後附寄三絕云集端卷首  
例科名還與方羅詆不平六十年來詩筆好沙中揀得是金  
聲袁趙集中留雅意蔣錢稿裏去偏心自注隨園歐北人閒  
心餘藉石也屏卻箏琶響自出成連海上琴故人幾輩漸迢迢展卷眞如  
賦大招蘭紙烏絲商畧徧寄君篋行爲魂銷芙初以爲首列  
違者未免猶有重科名之意而四家之詩鈔者未必是其上  
案欲鄙人爲別裁之也然恐才識弁陋於梧門先生無能爲  
役奈何

馮雲伯出都後以得見新刻詩話甚爲欣賞貽書見寄并寄  
長白笠叻觀察所與倡和詩牋相示拂水山莊云江總歸來  
白髮新坊灰餘燼戀無因風騷壇坫三朝重金粉河山半壁  
陳貂珥卽看皆後進蛾眉甘讓作完人孝陵銅狄苔花冷詞  
客空吟舊院春楓橋舟中云風勁峭帆收有力波柔枝櫓劃  
無痕京口懷古云水犀雄鎮三千甲明月臨江廿四橋皆朗  
麗清華自然高勝其弟可庵盆梅云疏影矮簷吟索笑橫枝  
瘦本畫掀篷虞山清明云新雨簾櫳初到燕曉煙城郭早聞  
鶯亦清脆可誦觀察虛懷下士嘗以所著就正於吾友甘亭  
繡友行部之餘時復銜彼山川極命風雅爲難能也觀察名  
斌良可庵名法良他日相見當一窺全豹此偶就所見錄之  
耳



毘陵太守卞雅堂先生與余素未通羔雁昨理堂來極言其  
傾襟之雅且見索拙藁適畢仲白還常州廼以一集爲寄蒙  
畚書殷重相推亦以所刻靜樂軒詩鈔數十首見示讀之真  
如箏笛繁會中忽聞玉琴清磬之音大抵取徑于玉笋而上  
潮齊梁非溫岐輩語也鐙云別語太恩恩愁多只自紅尊前  
花卻月窗外竹驚風繡枕拋單鳳羅屏憶斷虹長門殊未曉  
淚盡玉槃中寄暢園云橋長初啟客林暗未曉雅桂閣飄殘  
蠶松堂落細花雲生題拜石溪斷識流槎聞道灌園叟依依  
待 翠華厓口云紅樹拂行鑣秋聲動碧霄地盤雙峽起山  
挾百靈朝禁籞周法重車書屬國遙前驅方戒道鳴馬去蕭  
蕭關山月云黃雲天半成樓高卷旂飛霜濕寶刀夢繞玉門  
三萬里清笳吹淚落征袍塞雁詞云長天叫斷黑山秋大漠

飛沙上戍樓今夜故鄉聽不得朔風殘月似邊州其他句如  
送陳白雲宰青陽云名高責亦鉅道在官無小樂府如春江  
花月夜云行殿春遊暝不歸江城燕色如秋水清涼歌云穀  
照花空紅網煙竹亭夢雨拋齊紈等語比之燕臺無愁亦何  
多讓

近時貴宋板書於是作偽滋多有以明人及近時初印本仿  
宋刻之精好者以物染紙作舊色其無缺筆者或另刻一二  
頁或偽刊年號以實之而鑒別收藏家爭考偏傍字畫斷斷  
如也余嘗買得一舊板傳鐙錄中有一僧字殘闕者余戲謂  
友人曰此卽東坡所見本也題一絕其上云缺畫偏傍證不  
差或云閣本或麻沙近來考據都如此誰見寒鐙夜落花  
姪相比於冷攤上得殘稿一本皆五七言近體而塗抹缺落

多不可辨其人姓王名勅號復亨前有西泠徐士俊所作片石山人小傳云父號友六居武水之清風里當明季絕意干祿以岐黃游廬王江涇復亨亦習其業淵穆恬雅以詩酒自娛云云其稿中有與周青士往還又有西湖三泖廬山吉水道中諸作當亦以術出遊者也詩平平無出色處其可誦者如春日感懷云一雙蠟屐未全理九十春光已半賒秋夜云鐙影扶疏搖夜菊雨聲細碎雜秋蟲以其名字翳如故爲錄之

詩主性情固矣然言不典雅則入於俗調張茂先情詩云居懽懽夜促在感怨宵長此卽俗傳懽娛嫌夜短寂寞恨更長之語也而雅鄭霄壤謂格調可不講得乎

郭匏雅明府名毓圻少有文名解組後優游里邨與吳中故

舊宋香巖潘榕臯陸默齋諸公文酒流連極晚境之適與樊  
補之莫逆嘗寄聲道意余頻歲來往吳門竟未及相見今已  
化去矣補之以數詩見視七古爲多風格端重自是歸愚以  
來正派其再到蕪湖一律云穩臥江鄉繫渺思故交得見未  
嫌遲重聞秋水譚莊叟那有春山似郭熙自注前此在署爲  
悅研碧川作畫  
綠酒對君能薄醉黃花遲我出新詩只愁山館空朝夕籬角  
寒梅及此時明府築室桃花鵑有樓榜曰人與梅花共一樓  
用榕臯贈句也

補之又以其表姪王春浦士珠迎曦齋詩一冊屬爲點定且  
道其向往之意甚殷詩筆清雋可喜惜以早歲出遊無師友  
切磨之功故未遑深造答月山漢上云誰道相離易他鄉幾  
舊知因風傳信至是我憶君時秋樹江天暮黃花月下詩雁

鴻煩寄語把臂待春期餘如懷古杉云離情三逕菊客夢一樓砧寄壽喬巖州云江流搖岸動山勢壓帆來皆不苟然作者

魏唐沈君雪樵有二女長曰素芳次曰小芳皆工畫花草爛於琴事小芳尤明慧工巧數歲前余曾偕壽生芝舟丹叔過訪其居壽生與沈氏姻家也雪樵留小飲出觀兩女所畫冊子并命素芳於內室彈琴時小芳病初起亦於隔座作數弄今年歸聞小芳已夢遊仙矣爲之悵惋不置會雪樵以其畫蘭三幅索題余爲各作一絕句其上其一首云春風啜茗帽簷斜幽咽琴絲隔絳紗牋對遺芳一腸斷匹如不見此曇花紀其事也

小芳有遺詩數首夜月云森森叢桂露華稀螢火穿窗時一

飛明月滿樓渾似水下簾仍怕解羅衣再遊溪莊云去歲看  
梅梅已謝今春花又不多開東風埋怨梅花笑不是遲來便  
早來病起云嬌瘦扶難立垂簾坐碧紗春風吹尚可不忍見  
梨花末句殆詩讖耶

今春過吳中王生善才以其母夫人昭明閣內史所臨張夢  
晉倦繡圖見贈余向爲萬十二淵北題夢晉此圖云花陰漏  
轉支頤久睡起金鈴隔花走那有湔裙門草心暫閒暈碧裁  
紅手虎邱花月閨門柳乞食陽狂無不有君不見昌昌春物  
最無聊失路才人宕子婦內史爲仲瞿孝廉之配孝廉晚節  
潦倒內史先以嘔血亡回憶前詩落句若爲其夫婦而作亦  
可異也內史金姓名禮羸山水人物花鳥皆工尤精於畫佛  
莊嚴妙麗備極相好世多寶之

今年歸自袁浦居數日卽訪張雲巢司馬於吳興君方攝守  
事試事方畢薄領稍清因留下榻敘七年之別酒次出其爾  
年來詩稿一冊見示音調諧和而不拘於唐宋情性流露而  
不入於佻纖余深媿廿年之相知知之不盡乃如此也然雲  
巢方留意吏事思與漢史良民吏爭席區區詞筆何足爲雲  
巢重者姑記數章於此云爾題珠江春泛圖云我別珠江又  
四年披圖風景宛當前昨宵忽作還鄉夢酒罷詩成月滿天  
題朱竹垞煙雨歸畊圖云應詔多徵士歸畊有逸民如何簪  
筆者仍作荷鋤人蓑笠平生夢江湖自在身閒情聊寄託白  
髮獨傷春守歲云夙興夜則寐誰欺曰否否胡爲獨歲除不  
睡云相守相守直達旦有若防客走側耳聽晨雞仰而看北  
斗忽然東方明畢竟歲何有兒童事游戲壯盛耽杯酒勉強

欲支持筋力嗟老朽重慈健眠食天南一回首他如買菊云  
索價不嫌開口貴吟秋要占別家先酒債定添重九節詩情  
都在暮秋天老吏云每於對簿虛心鞠絕不逢人盛氣凌老  
農云眼看一飽真爲福足跡終年不入城老僕云眼前向背  
旁觀覺身後炎涼若輩分老伎云早知今日身如是深悔當  
年字莫愁皆別有寄託而婉約彌深

雲巢攝守台州時有爲二烈婦一貞女紀事之作其序鄧烈  
婦臨海人生員郭璋之室夫死依母撫孤孤又死鄧自經其  
母遑遽呼鄰子爲之接氣蘇後知其故割脣而死朱烈婦仙  
居人生員盧金之室夫死撫孤奉翁姑以孝聞已而孤死婦  
痛家世單傳懼遂絕嗣鬻簪珥爲翁置妾從容自經死貞女  
王氏名淑姑許氏李氏子李家遠在金陵其叔不相謀爲聘



吉氏李翁聞知愕無所措所親議並歸于李女父與吉氏皆  
許矣而母執不可遂返聘物女私留指環二家人不知也迨  
別字有期女約環于指赴井死三事皆奇偉可傳愚竊論之  
鄧以子死絕望奮然引決其母在倉卒之中不及顧慮此人  
情所有而以無意之污等於失身持及自割其事與歐公所  
紀李氏臂爲逆旅主人所牽而自斷者先後若出一轍其烈  
志貞心可泣鬼神而貫白日矣朱旣爲無後慮而買媵侍翁  
疑若可以無死而卒死淑姑室女未移所天從母之命未爲  
不可而終以不二之改自殺清冷皆較然不欺其志者行卽  
過中謂爲閨中之獨行可也若詩太長不錄書其事庶有以  
廣其傳焉

宜興茗壺有供春者名在時陳之上或作龔春云匠人姓名

惟查他山詞注云供春是大家婢以意製壺精好異衆余於聯句詩中用其說以爲於詞章設色爲宜耳近時茶盃託子多喜煎錫爲之刻銘於上有乞余書者爲作名曰創物知出女子配供春列槩几蓋用演繁露所載茶拓爲後蜀相崔女所造之說也又一銘云炙手不熱有盃不脫

余自吳興歸欲乞芝舟作一圖紀遊因循不果逾月後有以沈石田所畫碧浪湖圖求售者精采煥發頓還舊觀如獲奇珍也於是用題張雲巢圖韻作一詩於後諸同人皆用韻和之種水多至五疊今各錄一首於上以志一時倡酬之盛云余原詩云七百年來止六客而我重過已衰疾湖山依舊人渺然說與山靈應不識句有雲夢吞區寰手無一錢可買山爲人題畫自感啼清淚已與泉流潺石田妙作晴嵐晴如詩

無聲疑有聲草堂正對野艇泊颿影澹作浮雲行石橋絕溪  
溪曲折誰辨青鞵與布韉脩然羨殺山中人跂脚何知石頭  
滑此生百歲等朝露那不尋盟問鷗鷺扁舟落手尚江湖勝  
地回頭渺雲樹年年花月白嬋娟況有蘆雪兼菰煙江鄉如  
此歸不得自坐流浪寧關天多謝兩君能好事爲我證明如  
受託他時一櫂肯相尋侶和松陵倘可繼種水云水晶宮中  
游山客雨裏尚嫌烏榜疾歸來看畫披長卷舉眼雲巒笑相  
識白石翁久去人寰篋中留與君湖山山如爲君作娉嬋水  
如爲君生淙潺君言雨游亦遇晴湖山半是嘯鳥聲吳興太  
守勸客酒有客上山著屐行雨中雖憐角巾折濯足清流初  
不韞層層巖嶂屏翠開窗窗波淪簟紋滑湖山幾經詩發露  
已去游人渺飛鷺試將此畫重檢點人家有無雜村樹樹頭

至今竹使娟常如丹青朝暮煙碧瀾堂址在何處想見笛吹  
雁泊天君勤好古搜古事墨妙亭稱石柱記更請太守括圖  
經游跡山川可復繼小迂云久客得歸歸亦客歸旣恩恩出  
復疾頻年別卻好家山偶然相見如初識嗟我淩落猶塵寰  
知君愛畫尤愛山圖書一船虹貫月長淮放溜聽潺潺爲言  
春雨逢新晴艣枝搖作嘔啞聲碧浪湖水碧於玉勝侶兩兩  
招同行登山那愁屐齒折涉澗何妨足不韞雨餘微徑濕落  
衣時有鳥呼泥滑滑水村幾處人家露野老閑閑似漚鷺蹲  
岸畧杓欹紅欄繞屋參差圍綠樹雲鬟高下妙且娟澄波蕩  
漾含輕煙吳興風景本不惡況是三月江南天石田翁乃真  
好事留此與君補圖記我今讀畫兼讀詩筆不能工兩難繼  
已山云遊山發興同謝客敗意忽染疥癰疾豈山與我未有

緣不肯驟教真面識水精宮好非人寰碧浪中湧蓬萊山有  
時湖平波若鏡流出畦畛分潏潏撲人蒼翠迷陰晴傾耳不  
辨風水聲郇君出圖夸示我勸我急束嚴裝行今春探幽窮  
曲折日莫時時洗鞵鞵天台雁宕各攀躋行路何辭石頭滑  
石角鉤衣肘半露出沒蒼煙逐飛鷺靈巖哭兀幻奇峯淨明  
岑邃圍深樹雁山雄秀卞山娟過眼各已如雲煙此生能着  
幾兩屐行自斷之休問天石田老手稱能事臥遊更勝讀遊  
記回頭一笑問倪迂君不作圖誰復繼迂謂小廉山云十年不  
作湖州客天靳清遊心每疾江燕粉本昔曾觀江貫道燕文貴皆有茗溪  
圖今日披圖如舊識君詩奇秀絕人寰墨妙抹倒茗溪山想  
見瓊珠萬斛瀉定與碧浪高淙潏軒窗把卷當秋晴名筆畫  
水真有聲安得湖光山綠裏打槳便作凌波行詩才畫品兩

心折縱欲抽思愁線轆簿書官鼓都惱公真如偶奕筌先滑  
拈鬚對坐秋空露舊盟幸不寒鷗鷺歷過名山共數尋移神  
已入江天樹月夜把酒酬嬋娟勝遊勝事皆雲煙積久不磨  
惟古契墨緣豈亦司之天石田作畫亦恒事三百年前爲詩  
記偶然作合非偶然詩畫雙清定誰繼

雲伯以官事赴金陵以微疴寓居秦淮者匝月歸後得詩一  
卷其秦淮雜詩最爲幽豔頃又見楊芸士文蓀白門秋柳詞  
足以相匹云攬黃消碧最關情減畫眉痕太瘦生記得邨家  
粧閣底畫闌雙倚聽春鶯板橋離恨訴琵琶攀折難尋第五  
家桃葉渡頭秋水闊夕陽小立數寒鴉水西門外古城隅裊  
裊絲絲一萬株半幅荒寒憑畫取斷煙零雨莫愁湖風致不  
減漁洋芸墅橐筆繫鞵爲諸侯上客其詩得江山之助爲多

而五言時入韋柳之室永濟寺云涼煙有清影定禽無繁音  
山居云疏樾知已秋靜悟有清響落葉如雨聲前山月初上  
雪後夜坐云殘雪滿檐際夜深簾未垂不知新月影已上梅  
花枝七言如菽水懽違烏待哺稻梁謀急雁分行林光已曙  
禽猶寂風力初嚴酒易醒皆可誦

種水以其友人高雪舫桐詞屬爲點勘因錄二首於此憶王  
孫云鴨頭新綠水平堤柳擘晴絲煙縷齊野店無風酒望低  
波橋西恰恰流鶯花外啼綺羅香落葉云秋老梧桐煙寒橘  
柚野色蕭蕭如許扶起西風綠亂漫天飛舞才點向紅板溪  
橋又吹還綠蘿庭戶最難描一片淒涼酒醒昨夜打窗處漂  
零愁殺倦旅南北東西萬里有誰留汝古道斜陽自去自來  
無緒供野竈閒煮茶香載寒蟲輕隨波去記樓頭新綠濃時

隔江聽杜宇

桐城馬丈雨畊名春田余三十載以前見於金陵宋龍谿太守署中辱爲忘年之交以小友見待後余讀書鍾山書院君與姬傳先生爲中表兄弟時時過從後別去久不相聞頃于友人案頭見有山城春詞一冊乃嘉慶己卯所刻者桐城人爲多而雨畊夷然居首下注昔年八十有六喜靈光之無恙感舊雨而有懷爲之躍然以興其詞云宜民門外仙姑井無數峯巒簇簇來行到石莊頻放眼山山花似向儂開撥霧看花老眼強春情較比少年狂一枝藤杖雙芒屨只爲尋芳鎮日忙讀之想見此老風情不減雨畊工八法爲諸侯上客意所不可襍被竟出亦間從少年作冶遊至通而自然有節者也獨于余有知己之言常不去心未識何時重接風流因君



又感吾師之亡爲涕下霑襟其中如吳海晏潮云東臯春漲  
碧如煙幾處長橋斷復連那用藍輿花外轉蹋青鞵試雨餘  
天張耒齋會獻云雲心乍活白開皺柳眼才醒綠未勻欲問  
司花春幾許寶兒愁已不勝顰春心又託鳥先知五畝園西  
叫子規雲樹千重天萬里往年寒食憶家時張栢岑元襲云  
行徧山顛復水涯松林紅露小桃花晚風低颺青帘影春在  
前村賣酒家姚卿門觀間云貽宕春風乍放晴娛寒薄暖釀  
遊情河橋深鎖長虹影一路垂楊綠到城劉笠生敦元云紫  
來橋外柳絲絲又是江南三月時行盡長堤春意滿落花深  
淺馬蹄知其他佳句尚多

雲璈之亡余旣以詩哭之今年歸里余弟友山述其臨沒之  
言甚哀諄諄以身後之事爲託又出其病中數詩酸苦動人

今錄之於此不寐云永夜難成寐銀鐙獨自挑天高孤月迴  
風急衆星搖蟲語依苔榻秋心耿綺寮嚴更吹不斷起坐轉  
無聊古鏡云拂拭囊中鏡螭龍四角蟠盈盈秋水定爛爛月  
光圓應識須眉古誰憐骨相寒只愁衰病日爾便改顏看友  
山與葉君改吟將裒其所作以待孤子之成立而付之